

आकाशवाणी

1. प्रधानमंत्री नरेन्द्र मोदी होरें आखेआ ऐ जे पिछले त्रऊं-चऊं ब'रें च मुख्यै च 8 करोड़ नमें रोजगार पैदा कीते गे न ते एहदे बारे भारतीय रिजर्व बैंक दी रपोर्ट नै बेरोजगारी बारे झूठा प्रचार करने आले दी बोलती बंद करी दित्ती ऐ।
2. केन्द्री गृहमंत्री अमित शाह होर अज्ज मध्यप्रदेश दे सब्बने 55एं जिलें च पीएम कालेज ऑफ एक्सीलेंस दा उद्घाटन करगंन।
3. केन्द्र नै जम्मू कश्मीर दे उपराज्यपाल हुंदे इख्तियारें च बाद्धा कीता ऐ।
4. मौसम विभाग नै अज्ज नागालैंड, ओडिशा ते छत्तीसगढ़ च अज्ज भारी बरखा दे आसार दस्से न।
5. अमरीका दे साबका राष्ट्रपति डोनाल्ड ट्रंप, पेन्सिलवेनिया च इक सभा दरान गोली चलने दी घटना च बाल बाल बचे। गोली उंदे कन्नै गी चीरदे होई निकली।
6. क्रिकेट च भारत ते जिम्बावे बश्कार मजूदा श्रृंखला दा 5मां ते खीरी टी-20 मकाबला अज्ज हरारे च होग।

<><><><><><>

**PM-Job**

प्रधानमंत्री नरेन्द्र मोदी होरें आखेआ ऐ जे पिछले त्रऊं-चऊं ब'रें च 8 करोड़ नमें रोजगार पैदा कीते गे न जेहदे नै बेरोजगारी दे बारे च झूठा प्रचार करने आले दी बोलती बंद होई गई ऐ। कल मुंबई च भारतीय रिजर्व बैंक दी इक रिपोर्ट दा हवाला दिंदे होई उनें आखेआ जे देश च हुनर विकास ते रोजगार दी लोड़ ऐ ते केन्द्र सरकार इस भेठा मता कम्म करा करदी ऐ। मोदी होरें आखेआ जे दुष्प्रचार करने आलियां ताकतां बुनियादी ढांचे दे विकास, भारत च रासपूंजी आनने ते देसै दे आर्थिक विकास दियां दुश्मन न। कार्यक्रम च मोदी होरें सड़क, रेलवे ते समुंद्रै राएं विकास सरबंधी 29 ज्हार करोड़ रपे दिएं परियोजनाएं दी बुनियाद रखी। उनें आखेआ जे एनडीए सरकार मुख्यै च स्थिरता ते आर्थिक विकास गी तरजीह देआ करदी ऐ ते एहदे त्रीए कार्जकाल दा उनें सब्बने निवेशकें सुआगत कीता ऐ, जेहड़े भारत च

रासपूंजी लाना चांहदे न। मोदी होरें आखेआ जे महाराष्ट्र दा इतिहास बड़ा गौरवपूर्ण ऐ ते इस प्रदेश च खुशहाल भविक्ख दी बड़ी मती संभावना ऐ ते इसी दुनिया दी आर्थिक राजधानी बनाने लेई कम्म करना ऐ। उनें दस्सेआ जे मुंबई ते एहदे आले दोआले दे इलाकें च शुरू कीती जा'रदी बुनियादी ढांचा परियोजनाएं कन्नै आओजाई दी सुविधा बेहतर होग ते महिलाएं दी सुरक्षा बी बधोग। उनें दस्सेआ जे केन्द्र सरकार नै पालघर च दहानू थाहर, बधावन बंदरगाह दी मंजूरी देई दित्ती ऐ। एहदे नै 10 लक्ख लोकें गी कम्म रोजगार हासल होग। इस परियोजना पर 76 ज्हार करोड़ रुपे दी लागत औने दा अंदाजा ऐ।

<><><><><><>

## Amit Shah

केन्द्री गृहमंत्री अमित शाह होर अज्ज इंदौर थमां मध्यप्रदेश दे 55 जिलें च पीएम कालेज ऑफ एक्सीलेंस दा उद्घाटन करगंन। श्री शाह होर “एक पेड़ मां के नाम” अभियान च बी हिस्सा लैंगन। आकाशवाणी संवाददाता नै दस्सेआ ऐ जे एह कार्यक्रम इंदौर दे अटल बिहारी वाजपेयी सरकारी आर्टस ते कामर्स कालेज च लगगोग। हर जिला मुख्यालय च लगने आले इस कार्यक्रम च मध्यप्रदेश दे मुख्मन्त्री डॉ. मोहन यादव बी शामिल होंगन। जिला सतह आले कार्यक्रमें च विधानसभा अध्यक्ष, उपमुख्मन्त्री ते होर दुए मंत्री मजूद रौंहगन। पर्यावरण दी राखी हिफाजत तांई प्रधानमंत्री नरेन्द्र मोदी हुंदे आस्सेआ प्रेरित “एक पेड़ मां के नाम” अभियान तैहत अज्ज इंदौर जिले च इक दिने च 11 लक्ख पौधे लाने दा विश्व रिकार्ड बनाया जाग। श्री शाह होर सीमा सुरक्षा बल बीएसएफ दी रेवती रेंज च इस अभियान दी शुरूआत करगंन। ओह पीएम कालेज ऑफ एक्सीलेंस दे विद्यार्थिं तांई बस सेवा दा बी उद्घाटन करगंन।

<><><><><><>

## JK-LG

केन्द्र सरकार जम्मू कश्मीर दे उपराज्यपाल गी होर भत्ते अख्तियार दित्ते न। एहदे लेई जम्मू कश्मीर पुर्नगठन अधिनियम, 2019 च तरमीम कीती गई ऐ। एहदे कन्नै अखिल भारतीय सेवा दे अफसरें ते पुलस कर्मिं दे तबादले ते न्यांह पालिका कन्नै जुड़े दे अधिकारिं दी तैनाती दे मामलें च उपराज्यपाल हुंदे इख्तियार बधी गे न। तरमीम कीते गेदे नियमें मताबक, हुन पुलस, सार्वजनिक बवस्था अखिल भारतीय सेवा ते भ्रष्टाचार विरोधी ब्यूरो कन्नै सरबंधत

प्रस्ताह हुन सिद्दे गै मुख्ख सचिव हुंदे राएं उपराज्यपाल होरें गी भेजे जांगन। अज्जै तगर इनें प्रस्तावें ताई राज्य दे सचिव मैहकमें दी सिफारश दी लोड़ पौंदी ही।

<><><><><><>

## PM-Media

प्रधानमंत्री नरेन्द्र मोदी होरें आखेआ ऐ जे मीडिया गी लोड़चदा ऐ जे ओह सरकार दिएं लोक कल्याणकारी पैहलुएं गी बढ़ावा देने च सैहयोग करै। पर्यावरण संरक्षण पैहल "एक पेड़ मां के नाम" दे मिसाल दिंदे होई उनें आखेआ जे इस नूठी पैहल गी दुनिया भर च सराहना कीती गई ते मीडिया इसी जन आंदोलन बनाने च सैहयोगी होई सकदा ऐ। श्री मोदी होरें आखेआ विकसित भारत बनाने ताई अगले 25 ब'रे दी यात्रा च अखबारें ते रसालें दी भूमका महत्वै आली होग। श्री मोदी होर कल मुंबई च इंडियन न्यूज़ पेपर सोसायटी टावर्स दा उद्घाटन करने मगरा इक किट्टै गी संबोधत करा'रदे हे। प्रधानमंत्री होरें आखेआ जे मीडिया घराने गी दुनिया दी होर दुइएँ भाषाएं च बी अपना संस्करण पेश करियै भारतीय नजरियै गी वैश्विक स्तर पर लेई जाना लोड़चदा ऐ।

<><><><><><>

## Imran Khan

पाकिस्तान दी राजधानी इस्लामाबाद दी इक अदालतै साबका प्रधानमंत्री इमरान खान ते उंदी घरै आली बुशरा बीबी गी गैर कनूनी ब्याह आले मामले च बरी करी दित्ता ऐ। अदालत नै गैर इस्लामिक ब्याह सरबंधी सब्बै आरोपें गी खारज करी दित्ता ऐ। याचिका च इमरान खान ते बुशरा दे निकाह दी कनूनी वैधता गी चुनौती दित्ती गई ही। तोआई इस मामले च अदालत थमां बरी होने मगरा तुरत गै तोशखाना भ्रष्टाचार मामले च परतियै हिरासतै च लेई लैता गेआ। इमरान खान अगस्त 2023 थमां गै जेल च कैद न।

<><><><><><>

## Donald-Trump

अमरीका दे साबका राष्ट्रपति डोनाल्ड ट्रंप कल रातीं पेन्सिलवेनिया च इक चुनां सभा दरान गोली चलने दी घटना च घायल होई गे न। इस सिलसिले च सुरक्षाकर्मिं तुरत कारवाई

करदे होई इक बंदूकदारी गी मारी मकाया। इस घटना च इक होर आदमी दी बी मौत होई  
गेई ऐ ते इक होर दे घायल होने दी बी खबर ऐं इस घटना च डोनाल्ड ट्रंप मंच पर हेठ  
डिग्री पे। खूफिया सेवाएं दे अधिकारिएं उनेंगी चुक्कियै तुरत उत्थुआं बाहर लेईं गे। उंदे  
चेहरे पर खून दे नशान दिक्खे गे। ट्रंप होरें मगरा इक ब्यान जारी करियै जानकारी दित्ती  
जे ओह ठीक न ते गोली उंदे सज्जे कन्नै दे उपरले हिस्से गी चीरदे होई निकली ते उंदा  
बचाह होई गेआ। उनें खुफिया सेवाएं ते होर सुरक्षा अधिकारिएं दी तुरत कारवाई दी  
सराहना कीती। राष्ट्रपति जो बाइडेन होरें इस घटना दी निंदेया कीती ते डोनाल्ड ट्रंप होरें  
गी सुरक्षत बचाइयै बाहर लेईं जाने लेईं सुरक्षा अधिकारिएं दी सराहना कीती।

<><><><><><>

## Weather

मौसम विभाग ने नागालैंड, ओडिशा ते छत्तीसगढ़ च अज्ज भारी बरखा दे आसार दस्से न।  
तोआई मंगलवार तोड़ी कोंकण, गोवा ते मध्य महाराष्ट्र दे पच्छमी समुंद्री कंडे कन्नै लगदे  
इलाकें च बड़ी मती बरखा बरी सकदी ऐ। अज्ज ते कल कर्नाटक दे समुंद्री कंडें ते दक्खनी  
कर्नाटक दे अंदरले इलाकें च बी तेज बरखा पेई सकदी ऐ। तोआई तेलंगाना, मराठवाड़ा ते  
विदर्भ च संगारें तेज बरखा दा अनुमान ऐ।

<><><><><><>

## By Poll

विपक्षी दलें गी बड़ी मती बढ़त दिंदे होई कांग्रेस दी नुमायंदगी आले इंडी गठबंधन नै 10  
विधानसभा सीटें पर जित्त दर्ज कीती ऐ जेल्लै के बीजेपी नै दो सीटां जित्तियां न। तृणमूल  
कांग्रेस नै बंगाल उपचुनाएं च जित्त दर्ज कीती। कांग्रेस नै हिमाचल प्रदेश च 3 चा 2 ते  
बीजेपी नै हमीरपुर च इक सीट जित्ती। 10 जुलाई गी 7एं राज्यें च विधानसभा उपचुनां होए  
हे।

<><><><><><>

## Goyal Itly



<><><><><><>